

Dunador di trabao mester paga... PRIMA DI 6% PA ASEGURO MEDICO GENERAL

ORANJESTAD (AAN): Durante conferencia di prensa semanal di Consejo di Ministronan, Ministro Presidente a indica cu e tin tres aña caba ta tende oposicion pidi pa e Gobierno aki trompeca.

El a bisa cu tur hende sa cu e Gobierno aki a debilbe e 7 3/4 por ciento, y lo debilbe e "vakantieuitkering" cu a ser kita anteriormente.

"Ora mi tende nan bisa cu AZV lo ta un medida di 13%, mi ta kere cu esnan cu kier bende asina no ta di buena fe," Oduber a splica. El a puntra esnan cu ta critica asina tanto, ta con nan lo a ehecute? E kier sa tambe ta con ta saca afo cu e ta un medida di 13%?

E ta haya cu esnan cu ta critica no ta solidario cu gran parti di pueblo cu ta sclama y pidi pa un AZV.

El a apunta riba e hecho si cu logicamente ley no ta perfecto y si ta asina cu mester haci mehoranza, nan lo hacie.

Ministro Roland Laclé a indica cu den parlamento el a bisa cu no mester bin cu prima di pago pa trato medico ainda a base di e informa-

cion cu e tin.

Pa tal motibo el a pidi Departamento di Finanzas pa traha un calculo pe.

E parti cu dunador di trabao lo contribui cu ne ta 6%, y ta yega na 1993 na casi 38 millon Florin. Gobierno ta pone acerca 57 millon Florin pa total di 95 millon Florin. Pues un trahador no ta contribui, pero pa independientenan si nan lo mester paga 6% pa e AZV.

Pa 1994 e parti di dunador di trabao y esnan cu ta independiente ta 6% pa forma asina 39 millon Florin y loke Gobierno ta contribui ta 60 millon Florin.

Pa aña 1995 dunador di trabao ta duna 41 millon y Gobierno 62 millon Florin.

Esnan cu paga aworaki no mester paga. Salubridad Publico no lo crece mas cu 6%, y ta spera cu pa 5 aña no mester cobra trahador ningun cent pa esaki.

E ta lamenta cu specialistanan ta bisa cu no tin hende capacita pa forma presupuesto di riba 100 millon Florin. Gobierno lo busca experto riba e tereno aki pa pone e AZV funciona.

COALICION A OFENDE GREMIONAN

Segun AVP nan a haci bofon di gremionan!

ORANJESTAD (AAN): Diabierna Coalicion den Staten a aproba e proyecto di ley di e Aseguro Medico General, cual tabata constantemente den noticia e ultimo lunanan.

Hopi gremio a bini dilanti mostrando cu semper nan tabata di acuerdo pa e proyecto di ley aki, pero no di e forma cu Ministro Charro Kelly kier bini cu esun di dje.

Den Parlamento ayera definitivamente a keda confirma cu coalicion a ofende gremionan, ta loke DIARIO a tende. Den un reunion publico di Staten e decision a worde tuma pa invita tur e gremionan cu por tin problema cu introduccion di e ley di Aseguro General pa gastonan di enfermedad.

Reaccion cu a ricibi di AVP ayera ta indica cu durante e reunion aki a resulta cu Gobierno no a envolvi e gremionan den preparacion di e ley importante aki. Tur miembro di Parlamento tabata di acuerdo cu no por introduci e ley aki sin tin por lo menos un gran parti di e gremionan para su tras.

Un gran cantidad di gremio a presenta na Staten pa trece nan punto di bista dilanti. Tur cu excepcion di SEPA a declara cu nan no a haya participacion real y tampoco nan no ta di acuerdo cu e ley manera e ta formula awor.

Casi tur e gremionan a mustra tambe e disponibilidad pa ainda participa pa yega na un ley cu si por worde carga door di un gran mayoria di pueblo y specialmente e clase trahador.

Den e reaccion di oposicion, nan ta indica cu e miembronan di coalicion a splica e gremionan cu lo tene debido cuenta cu tur loke e gremionan a sugeri. Grandi tabata e sorpresa ora cu a sali na cla cu Gobierno sosteni door di e coalicion a dicidi di buldoze e ley en cuestion sin tene cuenta cu ningun di e sugerencianan di e gremionan y cu te hasta den reunion di Diabierna coalicion a haci bofon di e gremionan. Realmente ta un berguenza cu Parlamento a actua sin respeto pa gremionan importante den comunidad.

Den un comunicado emiti

pa Partido AVP, nan ta indica cu muy en particular e miembro di Parlamento pa ADN ta carga responsabilidad pa e trato onbeschoft cu e gremionan a haya. Esaki pasobra ta el a sugeri pa Staten atende e gremionan. AVP a propone pa Gobierno tende e gremionan, adapta e ley segun sugerencianan aceptable, pa despues bin back Parlamento.

AVP ta bisa cu miembro di Parlamento Pedro Bislip no tabata di acuerdo pa manda e proyecto di ley back pa Gobierno, mirando cu Gobierno ya a haci tur loke e tabata por y awor Staten mester tuma over.


Di e manera aki Bislip a crea e expectativa cerca e gremionan cu e biaha aki si nan lo worde scucha y cu e biaha aki si nan lo por contribui na e proyecto di ley. A resulta cu ningun momento tabata intencion di coalicion pa berdaderamente duna e gremionan participacion.

Tur loke e gremionan a trece dilanti no a haci diferencia como ya caba Ministro a dicidi cu ley mester pasa.

Diario orguyosamente ta presenta esun original, esun mihor, y esun mas gusta...


VOZNAN DI PUEBLO

Bo ta kere cu Aruba mester participa na ABC Tumba Festival?



Chicho Kock,
Musico-Cantante

Mi ta kere cu ta competencia sano, pero mi no ta di acuerdo di e manera cu el a bay e dos añanan cu a pasa. Pero un show lo ta hopi bunita pero no ta atrae publico. Gana nos ta pa nos publico, pero chance di perde no nos tin pa nan? Y mi ta diferencia di opinion cu huradonan, pero na nos huradonan mi kier bisa nan pa sigui honesto manera un Arubiano semper sa ta, y lo keda di ta.




Tattoo,
Cantante

Ami no ta haya, pasobra ta muchos sokete nan a haci cu nos. Nos Arubianonan ta mucho bon di corazon y a vota honestamente. E sobra huradonan a haci cos kens cu nos. Si tin ABC ami lo no participa ni pa gueststar. Esnan cu ta bay, wel ta nan decision pero e ora mi ta bisa cu nan no ta hende di principio. Hopi a bisa cu nan no ta bay, pasobra mester respecta bo mesun decision.



Didi Wernet,
Politico-Cantante

Categoricamente no! Tres aña nan a abusa di nos generosidad y nos bon boluntad pa cu ABC. Ta di lamenta si cu e bunita baby aki aser mata asina tempran. Entrecambio semper riba tur tereno ta bunita, pero e mester ta a base di respet mutuo. Nos a soporta hopi y aña pasa nos a bisa ta basta. Y nos ta considera lo susedido di aña pasa un bofa den cara di nos humilde y culto pueblo Arubano. Den 3 aña e premionan cu a worde kita di nos cantantenan Arubano mas bien a ser kita di nos pueblo Arubano. Pa dignidad y honor nos no tin di participa den Festival di ABC.



Vicente Kelly,
Musico

Aruba por participa na un festival di ABC pero sin competencia! Esaki mi ta bisa pa motibo cu en realidad nunca tabata tin un huzgamento corecto. Pero toch Aruba por sigui demostra su calidad di tumba na otro paisnan toch, segun mi opinion.



Robert Jeand'or,
Musico

Claro cu no. Nos tur sa e mal experiencianan cu nos a pasa cu e ABC Festivalnan. Nos a presenta tumbanan di calidad y un orquesta di primera. Y nos a worde ignora totalmente, pasobra huradonan di otro islanan no a tuma ni e molester di scucha nos tumbanan, pero a duna nos e puntuacionnan di mas abao. Pakico bay pasa "Berguenza" atrobe? Esey ta mi pregunta y mi pensamiento.